

MERKNAD TIL OMRÅDEREGULERING LONEVÅG-HATLAND

Underteikna er busett i Barkavika og har merknader til planane om bygging av ny småbåthamn i Barkavika/Lyktaneset, Lonevåg. Som nære naboar ønskjer me ikkje at planane om ny båthamn blir godkjent.

Bygging av ny båthamn vil øydeleggja eit flott naturområde som i alle år er brukt som rekreasjon og friområde. Med litt tilrettelegging vil ein kunna utvikla Lyktaneset til eit sentrumsnært eldorado for natur- og kulturopplevingar. Å leggja ei småbåthamn med 30 parkeringsplassar og stort sørvisbygg på denne perla, vil bety endå eit irreversibelt inngrep i den frå naturen si side, vakre lonevågsbygda. Utbygginga vil rase eit sentrumsnært grøntområde med mykje skog og eit svært rikt fugleliv – både i skogen og på sjøen. Å planera store delar av Lyktaneset ut til parkeringsplass, er i eit miljøperspektiv mildt sagt inga løysing for framtida.

Me støttar merknaden til Osterøy Turlag i denne saka. Ein må ta vare på dei grøne lommene som finst i bygda. Verdien av friluftsføremål på Lyktaneset vil ikkje berre bli redusert, som rådmannen skriv i kommentaren til turlaget sin merknad, men bli fullstendig øydelagt. Den planlagte hogsten av skog på Lyktaneset vil føra til Lonevåg vert meir vindutsett. I dag skjermar dei høge grantrea for vind.

For oss som naboar vil ei utbygging langt på veg øydeleggja utsikta til fjorden, og i tillegg skapa direkte innsyn frå båthamna til hage og tomt. Støyplaga for naboane vil også bli verre. Husa i Barkavika er allereie utsette for svært mykje støy frå trafikk, industriverksemd og lossing og transport av stein på kaien.

Me bed kommunen ta omsyn til innspela våre og spara eit viktig grønt- og friområde for oss og framtidige generasjonar. Hald småbåthamna i sentrum! Dette vil, som også Lonevåg helselag påpeikar, vera miljøskapande og invitera til handel.

Med venleg helsing

Bjarte Vik
Eli Simmenes Vik

